

01來學校上期待的時間

王英娟

「秀娟阿姨，後禮拜的菜單會使借阮看袂？」「好啊！恁若有想欲食的物件攏會使共阿姨講，阿姨會當請廚房阿姨煮予恁食。」「誠實的喔！會當看菜單，閣會使家己點菜，佇遮讀冊有夠幸福的啦！」「彼は當然的啊！絕對愛煮恁恰意食的料理，嘛定著愛攢恁愛食的點心！因為恁是阿姨上重要的人客，人客食了有滿意，就是我上大的快樂。」

秀娟阿姨設計出來的菜色逐工攏無仝，予阮遮的學生囡仔，平常時仔除了會使食著衛生的飯菜，閣有麵包、雞卵糕、豆奶、牛奶、蘋果汁……足濟項點心，逐工都輪流咧等阮。食著的各種菜蔬、果子也攏是上鮮、上著時的，予阮食甲飽tin-tong 閣食著滿足。若拄著舊曆的節日，猶閣有割包、肉粽、圓仔通食，遐濟物件予阮食袂癩嘛食袂飫，毋但食飽、食巧，閣食著營養，上重要的是食著一種幸福的滋味。

廚房阿姨的手藝有夠讚，毋但鹹泔下甲拄拄仔好，閣有法度煮出秀娟阿姨開出來的種種新菜色。阮全班便若看著廚房阿姨揀餐車來教室，連鞭就同齊共廚房阿姨講：「感謝你一粒一的服務，嘛感謝你辛苦的付出。」廚房阿姨就會笑吻吻。

啊若秀娟阿姨咧？伊毋但定定會先去廚房試鹹泔，閣會不三時來巡看阮逐班食中晝頓的狀況，溫柔仔問阮講：「飯菜有夠無？料理有恰意無？」繼落去，伊閣會共阮歡喜食中

晝頓的畫面翕起來，傳起去群組分享予家長看遮的寶貝囡仔食甲真樂暢的模樣。

我捌共阿母講：「學校的愛心媽媽遐爾濟，用心共我飼甲肥朥朥，予我有氣力認真讀冊拚頭名。厝內的阿母干焦你一个，煞惜我惜甲疼命命。仝款驚我楞著，散學攢點心予我紮去補習班食，轉來閣有阿母牌的宵夜通食。」阿母笑笑仔回我講：「恁學校的護理師阿姨看著你生肉閣生甲遮爾緊，面腔料想會加真歹看喔！」

若問我來學校上期待的是啥物？是上電腦課、體育課抑是下課咧？我會講：「攏毋是，我上期待的是食營養午餐啦！」

02無仝款的作業 楊馥綺

有一工自然課下課了後，有一个查埔囡仔來揣我開講，伊講：「老師，我足希望這改歇寒，會當加一寡好耍的作業，莫攏是愛寫字的功課。」我咧想，這馬的囡仔實在真無閒，若是會當利用假期共作業做一寡變化，嘛是袂糗。我想著後學期學校有欲辦一个科學週的活動，按呢會當予學生先激頭腦，所以我笑笑共應講：「好喔，咱家己來做迺迺物仔，你感覺啥款？」我今仔講煞，邊仔閣一个查某囡仔聽著，目睷展甲足大蕊，頭一直頓，搶咧講：「讚！讚！讚！」兩個囡仔閣做伙喝：「老師，愛你喔！」因為按呢，我才開始咧想講欲按怎出這個無仝款的作業咧。

「欲做啥物好耍的迺迺物仔咧？」想著矣，「就用樹奶俗家己設計的車身，配合上課所學著的科學原理，做一台會走的車。」

開學了後，逐家紮家己上滿意的車來比賽，有罐仔做的、杯仔做的，嘛有桶仔做的。有人講，發見樹奶愈粗愈經愈勢走；嘛有人講，那耍那改良，定定要甲袂記得食飯；閣有人講，個阿爸恰阿公陪伊做研究，三个人那做那討論，有夠趣味，感覺足幸福。感謝家長恰學生的支持，逐家拍拚學習的態度予我誠感動。

比賽的結果是一个查某囡仔著冠軍，伊用光碟恰塑膠杯仔組彼台車，走甲穩閣緊，會使對活動中心這引走甲彼引去，欲倚三十公尺遠，同學攏替伊歡喜，閣一直共拍嘆仔。

佇嘆仔聲中，我發現予囡仔家己做迺迺物仔，對個來講是一種趣味的挑戰，個會主動想欲學習。而且過程中毋但愛動腦筋設計、攢材料製作，閣愛想辦法解決問題。經過遮的訓練，確實會當啟發囡仔科學研究的動機、訓練耐性、增加智識，等作品完成，閣會當享受成就感恰培養感恩的心，予^個對未來參與科學研究充滿信心。活動中嘛看著囡仔互相欣賞、互相鼓勵的態度，無仝款的作業，確實是無仝款喔！

03教室裡的熱天 陳惠珠

聽老師講教育部為著欲予學生因仔佇學校有閣較四序的學習環境，教室欲安冷氣，這個逐班攏有冷氣的好消息予阮心內足歡喜的。「敢有影？後擺熱人有冷氣通吹矣！」

「誠實的喔？佇教室嘛有冷氣通吹！」逐個人攏毋敢相信這是正經的，嘛足期待彼工較緊到咧。

下學期開學了後，冷氣已經安起去矣，看著咧欲有冷氣通吹，阮逐個攏喙笑目笑。無佸久，教室的冷氣欲試看有啥物問題無，老師交代阮愛會記得加紮一領外套來學校，若準講傷冷著愛疊外套才袂去寒著。雖罔冷氣無問題，毋過著等天氣變熱才會用得使用。

清明連假天氣有加較燒熱，不而過教室冷氣使用規則有講，佇高溫的月份，室內的溫度超過二十八度才會使得開冷氣。

六月天火燒埔，真正會熱死人！教室裡有夠鬱熱，學校規定分樓層開冷氣，避免全校全一個時間啟動冷氣電力，致使超出契約容量。諱！這阮毋知啦！教室內底活欲熱死，人感覺誠齷齪，阮干焦想欲較緊吹著冷氣。上早是五樓九點會當開冷氣，繼落來是四樓九點十分，才閣輪著阮三樓。時間欲到矣！老師早就共冷氣卡佢遙控器攢好勢，九點二十一下到，齷、齷兩聲若親像佇咧共阮喝講：「緊共我開開！」緊！緊！緊！阮三步做一伐，毋免老師吩咐，逐

個跤手攏誠猛掠，隨倚起來關頭前門、後壁門、窗仔門，老師緊押遙控器共冷氣開開。無一觸仔久那來那涼，袂閣再頭昏昏腦鈍鈍，規個人精神攏好起來，逐個攏歡頭喜面開始認真上課囉！

猶毋過有當時仔阮老師踎教室煞袂得吹冷氣，啊都冷氣卡獨獨一張爾爾，便若阮去別間教室上課，就會共冷氣卡紮去，老師毋才無冷氣通吹。老師有夠可憐，佇遐爾仔熱的教室內面改簿仔，定定看伊改甲大粒汗細粒汗，三不五時提手巾仔咧拭汗。見擺阮欲排隊去別的所在上課，老師攏會向望阮下課愛較緊轉來咧。老師，阮知影啦！下課阮會緊轉來教室，共冷氣卡交予你，予你會得佢阮做伙吹冷氣吹甲涼涼涼。